



Nuuk, 27. maj 2015

Inatsisartut suleriaasianni § 37 naapertorlugu siusissukkut iliuuseqarnikkut suliniutit ingerlaqqinnissaat pillugit Naalackersuisunut apeqqutit apuuppakka

(Inatsisartunut ilaasortaq Aaja Chemnitz Larsen, Inuit Ataqatigiit)

Apeqqutit:

- 1) Tusakkat naapertorlugit inuusat atorlugit sungiusartitsineq unitsinniarneqarpoq. Naalackersuisut tamanna uppersarsinnaavaat?
- 2) Pitsaaliunermik suliat salliutinneqarunnaarnerat Naalackersuisunit pissusissamisoortutut isigineqarpa?
- 3) Inuusat atorlugit sunigusartitsinermi atortussat pisariarineqaramik qanoq akeqarsimappat, suliniullu Naalackersuisunit unitsinneqassappat/unitsinneqarpat tamakku qanoq pineqassappat?
- 4) Ilinniartitsinermi atortussat eqqortut pigineqarnissaat qulakkeerniarlugu Naalackersuisut qanoq iliorsimappat aammalu sulisorineqartut kinguaassiutitigut atoqatigiinnermut tunngasunik ilinniartitsinissaminnut piareersimanersut qulakkeerneqarsimava, tamatumani aamma inuusat atorlugit sunigusaaneq eqqarsaatigalugu?
- 5) Inuusat atorlugit sungiusaanermut suna taarsiunneqassava?
- 6) Qaqugukkut meeqqat inuusuttuaqqallu atoqatigiinnermut tunngasunik atuartinneqartarnissaat Naalackersuisut qanoq isumaqarfigaat?
- 7) Sapinngisamik siusinnerpaamik atoqatigiinnikkut tunngasunik meeqqat atuartinneqartalernissaat qulakkeerniarlugu Naalackersuisut qanoq iliuuseqassamaarpat, soorlu meeqqat atuarfiini nukarliit eqqarsatigalugit? Assersuutigalugu nammineq timigasamut oqartussaaneq pillugu ilinniartitsinermi atortussanik inerisaasoqarsinnaavoq.

Tunngavilersuut:

Inuusat atorlugit sunigusaasaneq siusissukkut iliuuseqarnerup ilagaa. Inuusat atorlugit sungiusaaneq misiliutit 2011-miit ingerlanneqalerpoq, misiliinermi angusat pitsaasut tunngavigalugit ataavartumik suliniutit atuitsinneqalernissaata tungaanut. Aallarnissamik akisuujusimavoq, 2013-imilu naliliinerup takutippaa, suliniutikkut kissaatiginngisamik naartuersittarnerit malunnaatilimmik ikileriarsimasut.

Suliniutip siunertaraa kissaatiginngisamik naartulertarnerit ikilisinnissaat, aammalu inuusuttut nammineq aalajangermikkut aatsaat naartulerusukkunik taamatut aalangiinissaannut periarfissinnissaat – inuusuttuaraalluni angajoqqaajunerup piffissami sivikitsumi, soorlu ulluni marlunni pingasuniluunniit misilinneratigut ilisimasaqalernikkut, Real-care-mit inuusat atorlugit.

Naliliinerup takutippaa, inuusuttuaqqat 46 %-iisa misileereernerup kingorna ilimagineqartumiit aatsaat kingusinnerusukkut angajoqqaanngornissartik aalajangiuttaraat. Takutinneqarpoq angajoqqaat tamarmik qitornatik ukiukippallaarlutik angajoqqaanngornissaat kissatiginngikkaat, aammalu misiliinerup kinguneranik naartunaveersaatit atorneqarnerat, inuusuttut namminneq oqaatigisaat naapertorlugit, malunnaatilimmik qaffariarsimasoq. Kiisalu nalilersuinermi aamma takutinneqarpoq, ilinniartsinneqartut ukiukilliartortillugit, inuusuttuaqqat namminneq isummersornerat naapertorlugu, sunniutit annertunerpaajusartut.

Apeqqutit ullut suliffiusut qulit ingerlaneranni akineqarnissaat kissaatigaara.